



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“ broj 95/12), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj 96/13) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2014. GODINU DEMOKRATA BOSNE I HERCEGOVINE

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS PREGLEDA I KONTROLE FINANSIJSKOG IZVJEŠTAJA .....	5
Predmet pregleda i kontrole. ....	5
Cilj pregleda i kontrole .....	5
Obim pregleda i kontrole .....	5
4. PRETHODNE KONTROLE I REVIZIJE .....	5
5. NALAZI I PREPORUKE REVIZIJE .....	5
5.1. NALAZI.....	5
5.2. PREPORUKE .....	6

## MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Demokrata Bosne i Hercegovine za 2014. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuje pouzdanost koja bi se dobila izvršenom revizijom u prostorijama stranke.

**Pregledom godišnjeg finansijskog izvještaja za 2014. godinu, utvrđeno je da su Demokrati Bosne i Hercegovine prekršili odredbe člana 5. stav (3) i (4), člana 8. stav (6), člana 11. i člana 12. stav (1) i (3) Zakona o finansiranju političkih stranaka.**

**Pregledom, odnosno kontrolom finansijskog izvještaja, nismo zapazili ništa značajno, osim gornje napomene, što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Demokrata Bosne i Hercegovine za 2014. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Demokrati Bosne i Hercegovine su se finansirali iz sljedećih izvora, kako je navedeno u tabeli:

R/B	Izvori finansiranja	Iznos (KM)	Učešće u izvorima finansiranja (%)
1.	Članarina	82,90	100,00%
2.	Prilozi fizičkih lica ( 3-a )	0,00	0,00%
3.	Prilozi pravnih lica ( 3-b )	0,00	0,00%
4.	Prihodi od imovine ( 3-c )	0,00	0,00%
5.	Prihodi od pr.lica ( 3-d )	0,00	0,00%
6.	Prihodi od poklona ( 3-e )	0,00	0,00%
7.	Prihodi iz budžeta ( 3-f )	0,00	0,00%
8.	Prihodi od propag. ( 3-g )	0,00	0,00%
9.	Ostali prihodi	0,00	0,00%
<b>I</b>	<b>Ukupni prihodi (1-9)</b>	<b>82,90</b>	<b>100,00%</b>
<b>II</b>	<b>Kreditno zaduženje kod banaka</b>	<b>0,00</b>	<b>0,00%</b>
	<b>Izvori finansiranja (I+II)</b>	<b>82,90</b>	<b>100,00%</b>

U godišnjem finansijskom izvještaju Demokrati Bosne i Hercegovine su iskazali ukupne rashode u iznosu od 81,90 KM.

## 2. PREDSTAVLJANJE POLITIČKE STRANKE

Naziv političke stranke je Demokrati Bosne i Hercegovine. Skraćeni naziv je Demokrati BiH.

Politička stranka pod nazivom Demokrati Bosne i Hercegovine upisana je u registar političkih organizacija kod Kantonalnog suda u Sarajevu, rješenjem broj: R-I-2/99 od 01.06.1999. godine, rješenjem broj: RF-1293/06 kod Općinskog Suda u Sarajevu, te rješenjem broj: 065-0-RegZ-15-007482 od 20.11.2015. godine kod Kantonalnog suda sa sjedištem u ulici Čekaluša br.14 Sarajevo.

Stranka je navela u godišnjem finansijskom izvještaju za 2014. godinu da joj je sjedište u ulici Titova br.28., dok je adresa Bolnička br. 7 Sarajevo.

U finansijskom izvještaju, stranka je navela lice ovlašteno za zastupanje političke stranke u 2014. godini prof.dr.sci. Safeta Ćibu, koji je preminuo 29.10.2014. godine.

Lice ovlašteno za podnošenje finansijskih izvještaja je Rusmir Ibrahimović.

Prema podacima iz godišnjeg finansijskog izvještaja za 2014. godinu, Demokrati Bosne i Hercegovine nemaju niže nivoe organizovanja.

### 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaj Demokrata Bosne i Hercegovine za 2014. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskog izvještaja Demokrata Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

### 4. PRETHODNE KONTROLE I REVIZIJE

Služba za reviziju je izvršila pregled i kontrolu godišnjih finansijskih izvještaja Demokrata Bosne i Hercegovine u periodu od 2006. do 2013. godine, nakon čega su izdati izvještaji o pregledu sa mišljenjem revizora, nalazima revizije i preporukama političkoj stranci.

Nakon izvršenog pregleda godišnjeg finansijskog izvještaja za 2013. godinu, Služba za reviziju je izdala izvještaj o pregledu sa mišljenjem, nalazima i preporukama stranci da uspostavi i vodi evidenciju o dobrovoljnim priložima, da ne prima priloge posredstvom trećih lica, da poslovne knjige vodi u skladu sa računovodstvenim propisima, da uspostavi i vodi evidenciju o svim prihodima i rashodima i da finansijske izvještaje podnosi u formi koju je odobrila Centralna izborna komisija BiH.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2014. godinu, utvrđeno je da Demokrati Bosne i Hercegovine nisu ispoštovali date preporuke.

### 5. NALAZI I PREPORUKE REVIZIJE

#### 5.1. NALAZI

- a) **Demokrati Bosne i Hercegovine su, primanjem dobrovoljnih priloga fizičkih i pravnih lica u vidu usluga, prekršili odredbe člana 5. stav (3) i (4) i člana 8. stav (6) Zakona o finansiranju političkih stranaka.**

Demokrati Bosne i Hercegovine su u periodu od 01.01. do 31.12.2014. godine, bez naknade koristili poslovne prostorije u ulici Čekaluša broj 14 u Sarajevu, koje su u vlasništvu Nafije Kalić. Uvidom u potvrdu broj 106-08/15 od 14.08.2015. godine, utvrđeno je da je prilog Nafije Kalić stranka ostvarila posredstvom trećeg lica (posrednika) Bosnia Airlinesa d.o.o. Sarajevo, što je suprotno odredbi člana 8. stav (6) Zakona o finansiranju političkih stranaka. Politička stranka nema račune, niti druge dokumente sa naznačenom tržišnom vrijednošću nenovčane donacije u skladu sa članom 5. stav (3) Zakona<sup>1</sup>, te nije u skladu sa odredbom iz stava (4) istog člana, vodila evidenciju o dobrovoljnim priložima.<sup>2</sup>

<sup>1</sup> U skladu sa odredbom člana 5. stav (3) Zakona o finansiranju političkih stranaka, dobrovoljnim priložima, u smislu ovog zakona, smatra se i pružanje usluga ili davanje proizvoda političkoj stranci bez naplate.

<sup>2</sup> U skladu sa odredbom člana 5. stav (4) Zakona političke stranke su dužne voditi evidenciju o prijemu dobrovoljnih priloga, te izdavati potvrde o prijemu dobrovoljnih priloga.

**b) Pregledom godišnjeg finansijskog izvještaja utvrđeno je su Demokrati Bosne i Hercegovine prekršili odredbe člana 11. i člana 12. stav (1) i (3) Zakona o finansiranju političkih stranaka.**

- (1) Poslovne knjige političke stranke nisu vođene u skladu sa računovodstvenim propisima<sup>3</sup>. U završnom računu za 2014. godinu, koji je sačinjen na osnovu poslovnih knjiga stranke, nisu iskazani prihodi, iako je politička stranka ostvarila prihod od članarine u iznosu od 82,90 KM. Takođe, prihod od nenovčanih donacija, stranka nije iskazala, čime je prekršila odredbe člana člana 12. stav (1) i (3) Zakona o finansiranju političkih stranaka.
- (2) Demokrati Bosne i Hercegovine nisu popunili obrasce godišnjeg finansijskog izvještaja u skladu sa Pravilnikom o godišnjim finansijskim izvještajima političkih stranaka – daljem tekstu Pravilnik, čime su prekršene odredbe člana 12. stav (3) Zakona o finansiranju političkih stranaka.
- U obrascu 2. (pregled prometa svih transakcijskih računa), stranka nije upisala broj transakcijskog računa sa prometom i stanjem na dan 31.12.2014. godine, čime je prekršila odredbe člana 11. Pravilnika<sup>4</sup>.
  - Stranka u obrascu 3 – e, nije iskazala nenovčanu donaciju za korišćenje poslovnih prostora bez naknade, čime su prekršene odredbe člana 18. Pravilnika.
  - U zbirnom obrascu 4. (rashodi političke stranke), stranka nije iskazala režijsko-administrativne i ostale troškove u iznosu od 81,90 KM, čime su prekršene odredbe člana 21. Pravilnika.

## **5.2. PREPORUKE**

***Preporučuje se Demokratima Bosne i Hercegovine da se pridržavaju odredaba Zakona o finansiranju političkih stranaka, a posebno na osnovu uočenih nedostataka se preporučuje:***

- ***da uspostave i vode evidencije o svim prihodima i rashodima, odnosno da poslovne knjige vode u skladu sa računovodstvenim propisima,***
- ***da ne primaju priloge posredstvom trećih lica,***
- ***da finansijske izvještaje podnose u formi koju je odobrila Centralna izborna komisija BiH i***
- ***da imenuju novo lice ovlašteno za predstavljanje i zastupanje stranke.***

### **Komentar:**

U ostavljenom roku, Demokrati Bosne i Hercegovine nisu dostavili primjedbu na Preliminarni izvještaj o pregledu godišnjeg finansijskog izvještaja za 2014. godinu.

Pomoćnik revizora  
Mr.sc. Goran Cicović

Šef Službe za reviziju  
Mr.sc. Hasida Gušić

<sup>3</sup> Politička stranka je obavezna voditi poslovne knjige i podnositi Završni račun u skladu sa Zakonom o računovodstvu i reviziji u Federaciji BiH.

<sup>4</sup> Prema podacima iz Izvještaja o transakcijskim računima iz Jedinstvenog registra Centralne banke BiH, transakcijski račun Demokrata BiH broj 1011010053785081 je aktivan i otvoren kod Privredne banke d.d Sarajevo.